

## 每週經課朗誦經文(巴克禮台語漢字)2013/03/03

### 共同經課 - 1 以賽亞書五十五章一節~九節

1 呃，見若恁嘴乾的著來就近水；也無錢的恁著來。來買來食；來啊，毋免銀，毋免價錢，來買酒及奶。  
2 恁啥事開費錢買彼個袂食得的物？啥事著磨佇彼個袂互人食飽的啊？恁著留心聽我就會食彼個好物，得著享受油膩，互心歡喜。3 恁著俯耳孔就近我；著聽，就恁的心神會活。我欲及恁立永遠的約，就是所應允大衛堅固的恩惠。4 看啊，我已經設立伊做列邦的干證，做列邦的君王及首領。5 看啊，你平素毋識的百姓，你欲叫伊來；平素毋識你的百姓亦欲走來倚你，攏是為著耶和華——你的上帝以色列的聖者，因為伊已經榮光你。6 著趁耶和華通尋著的時來尋伊，佇伊相近的時求叫伊。7 歹人著離開伊的路；不義的人著改換伊的念頭。歸向耶和華，伊欲憐憫伊；歸向咱的上帝，因為伊欲遍行赦免。8 耶和華講：我的念頭毋是恁的念頭；恁的路毋是我的路。9 因為天怎樣卡高地，按呢，我的路卡高恁的路；我的念頭卡高恁的念頭。

### 共同經課 - 2 詩篇六十三篇一節~八節

1 [大衛佇猶大曠野的時，做此首詩。]上帝啊，你是我的上帝，我趁早欲尋你，佇亢旱困苦無水的地，我的心嘴乾數念你；我的肉體切切欣慕你。2 我曾按呢佇聖所朝見你，為著愛看你的權能及你的榮光。3 因為你的慈愛比生命卡好，我的嘴唇欲謳唸你。4 我猶活的時欲按呢謳唸你；我欲奉你的名抬起我的手。5 我的心神欲飽足親像食骨髓油膩，我亦欲用歡喜的嘴唇謳唸你，6 就是我倒佇眠床記念你，佇暝間逐更數念你的時。7 因為你會幫助我，我跼佇你翅股的致蔭下欲歡喜出聲。8 我的心隨你住住；你的正手扶持我。

### 共同經課 - 3 哥林多前書十章一節~十三節

1 兄弟啊，我毋愛恁毋知咱的列祖攏佇雲下，也攏對海中經過，2 也攏佇雲中、海中受洗禮歸佇摩西；3 也攏食同一樣靈的食，也攏飲同一樣靈的飲。4 因為in所飲的，是對隨in靈的石磐出；彼個石磐就是基督。5 若是in中間卡多人互上帝無歡喜，因為in的身屍橫逆佇曠野。6 今諸個事是做咱的鑑戒，互咱莫得愛歹，親像in愛歹一樣；7 恁也莫得拜偶像，親像in中間有人拜伊。照所記載講：「百姓坐啲飲食，起來跳舞。」8 咱也莫得行淫，親像in中間有人行淫，一日死二萬三千人；9 咱也莫得試主，親像in中間有人試伊，就互蛇咬死。10 恁也莫得耦耦唸，親像in中間有人耦耦唸，就互剿滅的滅in。11 今in抵著諸個事是做鑑戒，續記載來警戒咱，就是諸個世代尾的人。12 所以，家己掠做倚在的，著謹慎，驚了跋倒。13 恁所抵著的試，無毋是人的常事。上帝是信實，無欲互恁抵著試過頭佇恁所會當；就是佇受試的時，欲續開脫出的路，互恁當會起。

### 共同經課 - 4 路加福音十三章一節~九節

1 當彼時，有幾若人佇啲將加利利人的事給耶穌講，就是彼拉多將in的血參佇in的牲禮的。2 耶穌應講：「因為諸個加利利人受此號的害，恁拍算in比眾加利利人卡有罪嗎？3 我給恁講，毋是！恁若無反悔，攏欲親像按呢滅無！4 抑是彼十八人，互西羅亞的塔倒落來壓死的；恁拍算in比攏總倚起佇耶路撒冷的人犯罪卡重嗎？5 我給恁講，毋是！恁若無反悔，攏欲照按呢滅無！」6 伊就設一個譬喻講：「某人有一櫬無花果樹栽佇伊的葡萄園裡。就來彼櫬尋果子，尋無。7 才對管園的講：『你看，我連連三年來對此櫬無花果樹尋果子，尋無。著給伊剉起來，啥事互伊也鎮所在！』8 應伊講：『主啊，今年請閣容允伊，聽候我四圍掘鬆，壅肥；9 後來若結果子就好，若無，你才給伊剉起來。』」